

ASO TOFI, 29 ME 2014

Na tauaofia le Fono Aoao Faitulafono i le itula e 9:00 i le taeao e tusa ai ma le Polokalame o Fonotaga a le Palemene 2014.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua tuuina atu nei le maliega i le Fono Aoao Faitulafono na te iloiloaina ai Tulafono Tau Faaofi ua faaalua iinei:

1. Tulafono Tau Faaofi o le Faatatauina o Tupe Faaopoopo (Nu.2) 2013/2014.
2. Tulafono Tau Faaofi o le Faatatauina o Tupe 2014/2015.

TUUINA ATU i lou nei Lima i lenei aso 28 o Me i le tausaga 2014.

(Sainia): Tui Atua Tupua Tamasese Efi
O LE AO O LE MALO.”

SAUNOAGA O MALIU

Na faasilasila e le Fofoga Fetalai le tuumalo o se tasi o sui usufono o le Palemene, Afioga Hon TOOMATA Alapati Poese Toomata i le aso 20

Aperila 2014, o le sa avea ma se tasi o sui usufono o le Palemene mo le Itumalo Faaalaalafaga o Salega.

*Na uluai filifilia mai le **Afioga Hon TOOMATA Alapati Poese Toomata** i le Palemene i le tausaga 1999-2001 ina ua tuumalo le Afioga LUAGALAU Levaula Kamu i le Paeaiga Lona XIII.*

*Na toe filifilia mai le **Afioga Hon TOOMATA Alapati Poese Toomata** i le Paeaiga Lona XIV i le tausaga 2001-2006.*

*O le aso 15 Fepuari 2005 sa tofia ai le **Afioga Hon TOOMATA Alapati Poese Toomata** ma Minisita o Faatoaga, Vaomatua, Faigafaiva, Ofisa o le Vaaitau ma le Faleoloa o Oloa tau Faatoaga.*

*O le tausaga 2006 sa tofia ai le **Afioga Hon TOOMATA Alapati Poese Toomata** ma Minisita mo Aoga, Taaloga ma Aganuu e aofia ai ma le Iunivesite Aoao o Samoa, le Aoga o Matata Eseese ma Aoga Faataitai.*

*Sa avea le **Afioga Hon TOOMATA Alapati Poese Toomata** ma Failautusi Faapalemene mo le Matagaluega o Tina ma Tamaitai i le tausaga 1999-2001.*

O le tausaga 2002-2004 sa Failautusi Faapalemene ai i le Matagaluega o Fefaatauaiga, Pisinisi ma Alamanuia.

O le tausaga 1999-2001 sa avea ai foi ma sui usufono o le Komiti o Aoga ma le Komiti o Oloa Gaosia Tulaga Muamua.

O le tausaga foi e 2001-2004 sa avea ai ma Sui Taitaifono o le Komiti o Tulafono Tau Faaofi.

Na tutulai filemu le Maota mo le minute e tasi e faailoa ai lo latou faaaloalo i le sui usufono ua tuumalo.

TUUINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono e tusa ai ma le Tulafono Tumau 48.

1. P.P.2014/2015 Nu.3, Lipoti Faaletausaga a le Faletupe o le Atinae o Samoa 2013.
2. P.P.2014/2015 Nu.4, Lipoti Faaletausaga o le Penisione a le Palemene mo le tausaga 2013.
3. P.P.2014/2015 Nu.5, Lipoti Faaletausaga a le Pulega o Tupe Faava o Malo mo le Tausaga 2012.
4. P.P.2014/2015 Nu.6, Lipoti a le Komisi o le Toefuataiga o Tulafono a Samoa i le Tulafono o Faamasinoga Faaitumalo 1969, Lipoti 12/13.
5. P.P.2014/2015 Nu.7, Lipoti Faaletausaga a le Pulega o Fale ma Malae Taalo a Samoa mo le Tausaga 2011/2012.
6. P.P.2014/2015 Nu.8, Lipoti Faaletausaga a le Faalapotopotoga o Inisiua Tau Soifua a Samoa mo le Tausaga 2013.
7. P.P.2014/2015 Nu.9, Lipoti Faaletausaga a le Faalapotopotoga Faavae tau Fatugao a Samoa 1 Iulai 2011 – 30 Iuni 2012.
8. P.P.2014/2015 Nu.10, Lipoti Faaletausaga Kamupani o Pulega Faaputugatupe Teufaafaigaluega o Mavaega Tausi a Samoa mo le Tausaga faaiiina 30 Iuni 2013.

9. P.P.2014/2015 Nu.11, Lipoti Faaletausaga a le Matagaluega o Faamasinoga ma le Faafoeina o Tulaga tau Faamasinoga mo le tausaga 2011-2012.
10. P.P.2014/2015 Nu.12, Lipoti a le Komisi o le Toefuataiga o Tulafono a Samoa i le Pulega o Measina a Samoa, Lipoti 13/13.
11. P.P.2014/2015 Nu.13, Lipoti Faaletausaga a le Matagaluega o Leoleo ma Falepuipui mo le Tausaga Faaletupe 2010/2011.
12. P.P.2014/2015 Nu.14, Lipoti Faaletausaga a le Matagaluega o Leoleo ma Falepuipui 2009-2010.
13. P.P.2014/2015 Nu.15, Lipoti a le Komisi Suesue i Mataupu i le Faiga Palota 2012.
14. P.P.2014/2015 Nu.16, Lipoti Faaletausaga a le Pulega o Malae Vaalele a Samoa 2012.
15. P.P.2014/2015 Nu.17, Lipoti Faaletausaga a le Faalapotopotoga Malosi Faaletise 2012-2013.
16. P.P.2014/2015 Nu.18, Faamatalaga o Tala o Tupe a le Pulega o Petipetiga mo le Tausaga faaiuina aso 30 Iuni 2013.
17. P.P.2014/2015 Nu.19, Tali atu a le Malo i le P.P.2013/2014 Nu.31, Lipoti a le Komiti o Tupe Maua ma Tupe Totogi i le P.P.2012/2013 Nu.41, Lipoti Faaletausaga a le Pulega o Tupe Faava o Malo a Samoa mo le Tausaga Faaletupe Faaiuina aso 30 Iuni 2011.
18. P.P.2014/2015 Nu.20, Tali atu a le Malo i le P.P.2013/2014 Nu.32, Lipoti a le Komiti o Tupe Maua ma Tupe Totogi i le P.P.2011/2012 Nu.95, Lipoti Faaletausaga a le Faalapotopotoga Inisiua tau Soifua a Samoa mo le Tausaga Faaletupe 2010/2011.
19. P.P.2014/2015 Nu.21, Tali atu a le Malo i le P.P.2013/2014 Nu.83, Lipoti a le Komiti o Faafoega Tau Pulega a le Malo i le P.P.2013/2014 Nu.3, Lipoti Faaletausaga a le Kamupani o Pulega a le Faaputugatupe Teufaafaigaluega o Mavaega Tausi a Samoa mo le Tausaga Faaiuina aso 30 Iuni 2012.
20. P.P.2014/2015 Nu.22, Tali atu a le Malo i le P.P.2013/2014 Nu.84, Lipoti a le Komiti o Faafoega tau Pulega a le Malo i le P.P.2012/2013 Nu.44, Faamatalaga o Sini Autasi a le Kamupani o Pulega a le Faaputugatupe Teu Faafaigaluega o Mavaega Tausi a Samoa mo Tausaga 2013-2015.
21. P.P.2014/2015 Nu.23, Lipoti Faaletausaga a le Matagaluega o Aoga, Taaloga ma Aganuu mo le Tausaga 1 Iulai 2012-30 Iuni 2013.
22. P.P.2014/2015 Nu.24, Lipoti Faaletausaga a le Matagaluega o Leoleo ma Falepuipui mo le Tausaga Faaletupe 2011-2013.
23. P.P.2014/2015 Nu.25, Lipoti Faaletausaga a le Pulega o le Suavai mo le Tausaga 2012-2013.
24. P.P.2014/2015 Nu.26, Tali atu a le Malo i le P.P.2013/2014 Nu.106, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P.2013/2014 Nu.5, Lipoti Faaletausaga a le Faaletupe o Atinae o Samoa mo le Tausaga Faaletupe Faaiuina aso 30 Iuni 2012.
25. P.P.2014/2015 Nu.27, Tali atu a le Malo i le P.P.2013/2014 Nu.95, Lipoti a le Komiti o Faafoega tau Pulega a le Malo i le P.P.2013/2014 Nu.77, Lipoti Faaletausaga a le Ofisa o le Loia Sili mo le Tausaga Faaletupe Faaiuina aso 30 Iuni 2012.

26. P.P.2014/2015 Nu.28, Tali atu a le Malo i le P.P.2013/2014 Nu.92, Lipoti a le Komiti o Tupe Maua ma Tupe Totogi i le P.P.2012/2013 Nu.61 & P.P.2013/2014 Nu.75, Lipoti Faaletausaga a le Kamupani Vaalele a le Polenisia mo le Tausaga Faaletupe faaiiina aso 30 Iuni 2012 ma le 30 Iuni 2013.
27. P.P.2014/2015 Nu.29, Tali atu a le Malo i le P.P.2013/2014 Nu.59, Lipoti a le Komiti o Galuega, Felauaiga ma Siosiomaga i le P.P.2012/2013 Nu.73, Lipoti Faaletausaga a le Pulega o Felauaiga i le Laueleele mo le Tausaga Faaletupe faaiiina aso 30 Iuni 2010.

FOFOGA FETALAI: I le agaga faaaloalo i leni taeao fou ou te faatalofa atu ai i le paia maualuga o le Maota i ona tulaga faalupe. Ua faamalo le soifua manuia ma le soifua laulelei i le paia ma le mamalu maualuga o lo tatou Maota ona ua mafai ona tatou toe potopoto faatasi i leni aso fono e pei ona tatou tuupoina. Malo le onosai, malo le faapalepale, ua faamalo le soifua manuia. Sa tatou tuupoina i na vaiaso ma nisi o masina ua tuana'i leni faamoemoe, ae faafetai i le Atua ua mafai ona toe taitaiina mai lo outou soifua manuia i leni taeao fou. O le a tatou alo i a tatou galuega o leni aso e ala i faamoemoga ma le polokalame ua uma ona faataatia, ma o le talitonuga o le a au le Atua e ala i le tatou Taulaga na siitia i leni aso.

E faapena foi ona faapai atu i le tapuaiga a Samoa i ona tulaga faalupe, aua o le tapuaiga o faiva e manuia ai a tatou galuega aua le faamoemoe i leni aso aemaise polokalame ua uma ona faataatia.

Alo maia le Palemene ona e talitonu foi e tasi le tatou aso fono i leni aso, ona ua ave le faamuamua e tusa ma Tulafono Tumau ona o le Tala Faatatau o Tupe.

LAFO A LE KOMITI O GALUEGA, TULAFONO TUMAU, MAOTA FONON MA MATAUPU TAU FAIGA PALOTA

FOFOGA FETALAI: Tulai maia lau Afioga i le sui usufono o le Komiti o Galuega, Tulafono Tumau, Maota Fono ma Mataupu Tau Faiga Palota mo le lafo a le Komiti.

Tofa Hon TUUU ANASII LEOTA (Sui Usufono o le Komiti o Galuega, Tulafono Tumau, Maota Fono ma Mataupu Tau Faiga Palota): Faafetai i lau Afioga i le Fofoga Fetalai. Ma ou te fia piiama foi i le faamua ma le faasagi ua e siitia i leni taeao na liugalua aua lo tatou vatapuia ma lo tatou Tapaau Sili o i le lagi, ua taoto peau o le sami, ua moe foi matamatagi, sa o tatou tofafa i manu ae sau mala e atiae. Ae a leni taeao? O lea ua tatou alafai mai i le manuia ma le fiafia, ia tatou faafoi pea le viiga ma le faafetai i le faasoa poto ma le agalelei o lo tatou Silisiliese.

Lau Afioga i le Fofoga Fetalai, ua ou tulai atu ma le faaaloalo ou te faatu le lafo e tusa ai ma Tulafono Tumau 46, *Ina ia toe faaauau Galuega Tuua mai le Tauaofiaga 2012/2014 e pei ona tusia i le Pepa Faaopoopo o Galuega 2014/2015 Nu.1.*

Ma lou faaaloalo.

Faaluaina e le sui usufono mo Alataua Sisifo.

Na faamaonia le lafo.

**TULAFONO TAU FAAOFI O LE FAATATAUINA O TUPE
FAAOPOOPO (NU.2) 2013/2014 – faitauga muamua**

FOFOGA FETALAI: Tulai mai lau Afioga i le Palemia ma le Minisita o Tupe.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI (Palemia, Minisita o Tupe): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.2) 2013/2014 i lona faitauga muamua.*

Faaluaina e le Sui Palemia, Minisita mo Tupe Maua ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

**TALA FAATATAU O TUPE FAAOPOOPO (NU.2) 2013/2014
– faataatia i luga o le Laulau a Fono**

Na faataatia i luga o le Laulau a Fono e le Susuga Hon Tuilaepa Fatialofa Lupesoliai Aiono Neioti Sailele Malielegaoi, Palemia ma le Minisita o Tupe le Tala Faatatau o Tupe Faaopoopo (Nu.2) 2013/2014.

**TULAFONO TAU FAAOFI O LE FAATATAUINA O TUPE
FAAOPOOPO (NU.2) 2013/2014 – lafo mo le faitauga faalua**

FOFOGA FETALAI: Tulai mai lau Afioga i le Palemia ma le Minisita o Tupe.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe Faaopoopo (Nu.2) 2013/2014 i lona faitauga faalua, ma o le Faamatalaga o Tupe Faaopoopo o le a aofia i le Lauga o le Tala Autu o le Tupe 2014/2015.*

Faaluaina e le Sui Palemia, Minisita mo Tupe Maua, Minisita mo Galuega Tau Alamanuia ma Atinae a le Malo, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: E tusa ai ma le Tulafono Tumau 132 o le a tolopo felafolafoaiga i le Tulafono Tau Faaofi o le Faatatauina o Tupe Faaopoopo (Nu.2) 2013/2014 e le itiiti ifo i le 14 aso a o tuuina atu le Tala Faatatau o

Tupe Faaopoopo (Nu.2) 2013/2014 mo le iloiloga a le Komiti o Tupe Maua ma Tupe Totogi ma toe lipoti mai i le Fono Aoao.

**TULAFONO TAU FAAOFI O LE FAATATAUINA O TUPE
2014/2015 – faitauga muamua**

FOFOGA FETALAI: Tulai mai lau Afioga i le Palemia ma le Minisita o Tupe.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2014/2015 i lona faitauga muamua.*

Faaluaina e le Minisita mo Tupe Maua, Minisita mo Galuega Tau Alamanuia ma Atinae a le Malo, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga muamua.

**TALA FAATATAU AUTU O TUPE 2014/2015
– faataatia i luga o le Laulau a Fono**

Na faataatia i luga o le Laulau a Fono e le Susuga Hon Tuilaepa Fatialofa Lupesoliai Aiono Neioti Sailele Malielegaoi, Palemia ma le Minisita o Tupe le Tala Faatatau Autu o Tupe 2014/2015.

**TULAFONO TAU FAAOFI O LE FAATATAUINA O TUPE 2014/2015
– lafo mo le faitauga faalua**

FOFOGA FETALAI: Tulai mai lau Afioga i le Palemia ma le Minisita o Tupe.

Susuga Hon TUILAEPa FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2014/2015 i lona faitauga faalua.*

Faaluaina e le Sui Palemia, Minisita mo Tupe Maua, Minisita mo Galuega Tau Alamanuia ma Atinae a le Malo, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: Tulai mai lau Afioga i le Palemia ma le Minisita o Tupe mo lau Saunoaga.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga o le fesili atu, o le lauga lea o le a faagasolo?

FOFOGA FETALAI: O lea lava lau Afioga.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lelei.

**SAUNOAGA O LE TALA FAATATAU AUTU O TUPE 2014/2015
“TOE TAPU’E LE TAMAOAIGA:**

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, tatou te taufai faafetaia le alofa matalasi o le tatou Matai Sili i Lona taitaiina saogalemu mai o tatou uma i leni taeao fou. O le a ou le fai atu o se taeao na liugalua e lei liliuina le taeao i le aoauli. O le tatou Fonousu leni a Samoa, o lea ua potu moli i futiafu e tasi, aua ua atoa i le Maota leni paia faalupelupe o Samoa i Aiga ma latou Tama, e faapea foi le Usoga a Tumua ma Puleono i Salafai. Ia faafoi laia o le viiga i le Atua aua e leai se mea tatou te mafaia ona fai, pe a Ia le finagalo i ai.

Ae ou te tulai atu ma le ava tele lau Afioga i le Fofoga Fetalai, e tusa ai ma le Tulafono Tumau 124, e ia te au le ava ma le faaaloalo e fai ai au ma sui o le Malo, ou te tuuina atu ai se ootoga o le Tala Faatatau Autu o le Tupe mo le tausaga faaletupe 2014/2015 i luma o le Laulau a Fono a le Palemene.

I. FAAVAIE O LE TALA AUTU O LE TUPE

Lau Afioga i le Fofoga Fetalai ma sui usufono mamalu o le Palemene, o leni tala o le tupe o lo o faavaie i se tamaoaiga toefuataiga ua matua lelei atoatoa, talu mai galuega toe faaleleia ona o le afa o Evani, ua maitauina ai le toe fotuai malosi mai o le tamaoaiga ma ua i ai foi le faanaunautaiga o le tatou Malo o le avanoa lelei lea e toe tapue atili ai ma saga uunaia le tamaoaiga ina ia mauaa ma malosi ma tupu, tupu pea. O lo o fuafua e oo atu le malosi o le tupu o le tamaoaiga i le 2.5% i le isi 2-3 tausaga o lumanai. O se taunuuga lelei tele lea pe a fua i tausaga e lua ua tuanai, o taimi ia o tau fofo o tatou aafiaga na faatamaia ai le tatou tamaoaiga e le afa na ou taua.

I se vaaiga i le tamaoaiga o le lalolagi, o loo maitauina ai foi le tulaga sologa lelei ona ua toe tulai mai i le malosi tamaoaiga o atunuu tetele e i ai Amerika ma le atu Europa. Aisea e taua ai le agai i fafo o upu o le lauga? O le tali, o le tupu foi o le tulaga lelei o le tamaoaiga o le lalolagi, e atili manuia ai foi ma tatou e ala i seleni tatou te maua mai o tatou aiga o aumau ai i fafo faapea foi tagata tafafao asiasi mai i Samoa faapea foi fesoasoani tatou te maua mai a tatou paaga o lo o agalelei mai i a tatou atinae o lo o fai.

II. TAIALA O LE TALA O LE TUPE

O le toe fotuai mai la o le tamaoaiga faapea le faasolosolo ina maea galuega toe faaleleia o le afa na aafia ai tatou, ua avea lea ma taiala e faavae ai le Tala o le Tupe lenei mo le tausaga fou i le 2014/15. O loo fuafua e ausia pe a se faasiliga o tupe faaalu nai lo tupe maua, peitai o le a maualalo atu pe a fua i le tausaga faaletupe na sei faatoa mavae atu nei, 2013/14. E 4.2% o le a i ai le faasiliga o tupe alu nai lo tupe maua i le tausaga fou 2014/15 fuafua lea i le 4.8 % sa fuafuaina mo le tausaga faaletupe lea o le a maea, 2013/14. O loo atagia mai lea tulaga le usitaia e le tatou Malo o ana folafolaga ma fuafuaga ina ia ausia le tapulaa e 3.5% o le tamaoaiga i le isi tolu tausaga o lumanai nei.

I le tulaga o tupe maua, e lē o iai se fuafuaga a le tatou Malo e tagofia lafoga ma tiute i oloa faaulufale mai, lafoga ia i luga o tupe maua e faatupe ai lenei Tala o le Tupe. Peitai ona o le naunautaiga ina ia siitia atili le auaunaga a Matagaluega ma Faalapotopotoga a le Malo i le lava foi lea o le latou malosi tau tupe, o lea ua faatino ai le iloiloga o tologi fuapau ina ia maioio manino le talafeagai lelei o tau e faatino ai ia auaunaga ma mafai ai ona tuuina atu le auaunaga aupito silisili ona lelei mo le tatou atunuu lautele. O lona uiga, ia fuafua lelei le tau e fetui ma le auaunaga ua siitia lona lelei talafeagai mo le soifuaga faaneionapo.

O le a mataituina ma le totoa e le tatou Malo le tulaga o tatou nonogatupe po o aitalafu ma lona sao taua i le faatupeina o atinae tetele a le atunuu. E manatu le Malo o nisi nonogatupe fou e fia faatautaia, o le a sosolo lava i luga o le Taiala mo le pulea lelei o aitalafu (Medium Term Debt Management Strategy) ma ia saofaga i le siisii pea i luga o le tamaoaiga.

Ia, o upu tomua na o le Lauga, ae aua le poia Faleolō, o lē lava ua fia tofa, e le afaina ona e fai sina umi o le lauga, ae e le o se agasala foi le fai ma to le sela.

III. OTO’OTOGA O LE TALA O LE TUPE

Lau Afioga i le Fofoga Fetalai

O le oto’otoga lenei o le Tala Faatatau Autu o le Tupe mo le Tausaga Faaletupe 2014/2015:

Tupe Maua i le Aofaiga po o le Aoaotetele	\$722,962,208
<u>Tupe Maua</u>	\$722,962,208
Tupe Maua Masani	\$544,910,258
Tupe Fa’ameaalofa mai Fafu	\$178,051,950
Tupe Faaalu i le Aofaiga po o le Aoaotetele.....	\$792,089,820.
<u>Tupe Fa’aalu</u>	\$792,089,820
Tupe Fa’aalu Faaletulafono	\$ 88,339,342
Tupe Fa’aalu i Polokalame	\$492,542,095
Tupe Fa’aalu i Atina’e	\$196,432,120
Tupe Fa’aalu le Fuafuaina	\$ 14,776,263

Ia ona maua ai lea o le Faasiliga o Tupe Alu i luga o Tupe Maua na o sina (\$ **69,127,613**), o le a faatupe mai i Nonogatupe e māmā lava le tului ia le \$73,613,155, o lona uiga e i ai le tupe faasili. Ma o faiga faavae ia o tupe o lo o lelei faafoe o le i ai lea o se faasiliga e mau fetuunai ai fuafuaga fai o le Faasiliga o le Tupe Maua i luga o Tupe Alu e \$ 4,485,542, o le faa-Peretania o le Tax Surplus.

Faasiliga o Tupe Alu i Tupe Maua

(\$ 69,127,613)

Faatupeina mai:

Nonogatupe e māmā tului

\$ 73,613,155

Tupe Faasili

\$ 4,485,542

O le aotelega o le Tala o le Tupe 2014/2015, ua faamoemoe e faamauina se faasiliga o tupe fa'aalu nai lo tupe maua e \$69.1 miliona tala lea sa taua muamua i luga, tusa lea ma le 4.2% o le tuu aofa'iga o le tatou tamaoaiga. O le a ave pea le faamuamua i galuega tetele e pei ona iai le taiala mo le atina'e o Samoa, faapea le sauni atu o Samoa e talimalo i le fononotele foi lea o lo o fuafua nei a atunuu po o Atumotu tau Atiaie a le Lalolagi le SIDS ae auai uma mai lava ia sui uma o Malo Afaatasi e usuia i le tausaga nei, faapea foi ma tapenaga mo taaloga a Tupulaga Talavou o Malo o Taupulega i le tausaga fou. O ni sauniga maoae tele nei sauniga Faava o Malo lea o le a talimalo ai Samoa i sui o Malo o le Lalolagi, ua tupu tonu lava i le tatou Paeaiiga lenei a le Palemene, e atagia ai foi le taualoa o le Malo ma lona maopoopoga, stability.

O le fa'aitiitia o le faasiliga o tupe alu nai lo tupe maua mai le 4.8% i le 4.2% mo le tausaga fou, ua matua manino ai le faanaunautaiga o le tatou Malo ina ia ausia le tapulaa e 3.5% o le tamaoaiga i le tolu tausaga o lumanai ai.

O le faasiliga o tupe fa'aalu nai lo tupe maua mo le tausaga faaletupe fou lea o le a tatou agai atu i ai e fitoitonu i ai le Tala Autu o le Tupe lenei 2014/2015 o le a faatupeina lava mai nonogatupe e māmā ma e matua maualalo lava le tului.

IV. FAVAE O TUPE MAUA

Lau Afioga i le Fofoga Fetalai, o se vaaiga puupuu lenei i a tatou Tupe Maua o le a ou ootooina atu.

O le a si'itia tupe maua masani i le 1% pe a fua i le tausaga o le a mavae atu nei 2013/14. Peita'i o tupe fa'ameaalofa mai fafo, o le a fa'aitiitia i le 27% ona ua tau fa'ai'ui'u galuega toe faaleleia talu ai le Afa o Evani.

Tasi lea itu e ao ona tatou silafia e tele ai tupe faameaalofa mai a atunuu o lo o lagolago mai ia Samoa, o le oso mai o se faalavelave matuia faafuasei tatou te le fia moomia.

O le toe iloiloaina o totogifuapau (rebased of fees and charges) mo auunaga a Matagaluega ma Fa'alapotopotoga a le tatou Malo, o se faiga faavae iloga lea ina ia mafai ai ona tuuina atu le auunaga i le tulaga aupito silisili ona lelei. O le upu moni lava e i ai taimi e lē 'ato'atoa ai le auunaga a Matagaluega ma e i ai le manatu o lenei iloiloiga o le a fesoasoani tele lea i le saga faaleleia atili o le latou auunaga. I le faatinoina o lenei iloiloiga sa

lualuga lava i le manatu le naunau ina ia māmā se aafiaga i o tatou tagata lautele ma pisinisi ma 'ia 'aua ne'i ave ma mafua'aga e soona punitia ai le maua e soo se tagata o auunaga a le Malo ma mauafafia ai faitioga faaletata a ē e fai ma fili e masani i ia mea o le faitio i fuafuaga taua mamao a le tatou Malo.

V. ATINA'E FAAMUAMUA

Lau Afioga i le Fofoga Fetalai ma sui mamalu o le tatou Palemene.

O le aofaiga o tupe fa'aalu fuafuaina mo le 2014/2015, e \$792 miliona tala, ma e \$49 miliona tala ua fa'aitiitia ai pe a fua i le tausaga lea o lo o faagasolo o le a mavae atu nei 2013/2014. Ua mafua lea tulaga ona ua tele lava ina mae'a a tatou galuega toe fa'aleleia talu ai le Afā o Evani le Afa lea na agi ia Tesema o le tausaga e 2012.

O le auiliiliina o atina'e ua ave i ai le fa'amuamua ma tupe faagaga mo le tausaga faaletupe fou 2014/15 e faapea ona ou faataoto atu:

1. A'oa'oga

E \$84 miliona tala ua faatatau fa'aagaga mo le atina'e o aoga. E tusa lea ma le 17.1% o le tau aofa'i o tupe fa'aalu, ma o vaega nei lea ua ave nei i ai le fa'amuamua:

- \$52.3 miliona e faatino ai le tautua a le Matagaluega o Aoga, Ta'alogaga ma Aganu'u.
- \$6.0 miliona ua faagaga e faa-mealofa mo Aoga a Ekalesia ma Aoga Tumaoti. Ua 30 nei tausaga o faagasolo pea lenei faiga faavae a le Faigamalo lenei na amata mai lava i le tausaga e 1984, ma o lo o faalagolago pea i ai ia le tele o aoga nei i tua e le gata o Aoga a Ekalesia, ae faapea foi isi Aoga Tumaoti o lo o lagolagosua e lenei galuega tele, o le faaaogaina o fanau a Samoa.
- \$11.9 miliona ua faamatu atu e lagolago ai le tatou Iunivesite Aoao o Samoa (NUS). Mai lea aofaiga e \$1.4 miliona ua fa'aagaga mo le vaega lea o le Iunivesite o le a aoaoina ai a tatou Fomai (Oceania University of Medicine) lea ua i lalo nei o le fa'amalumaluga a le NUS. O lea ua pulea nei foi i Samoa le aoaoina o tatou Fomai sa le mafai ona faia muamua e Samoa le OUM ma o fa'amanuiaga uma lava e ono afua mai ai o le a maua uma e le Malo e aunoa ma le toe aiaina mai fafo e pei o le mea sa sau ai, o le tatou Aoga Faafomai i lona amataga mai, lona uiga o le Aoga lea Faafomai sa pasia atu i le Palemene lenei, o se Aoga Faafomai sa fai faatasi ma nisi foi mai fafo, lea la ua pulea lava e le tatou Iunivesite.
- \$1.5 miliona o le a fa'atupe ai api, peni ma meaaoga uma e faaaogaina e alo ma fanau aoga.
- E \$3.8 miliona le sao o le tatou Malo i pili aoga o le fanau, lea o lo'o fesoasoani mai ai foi le Malo o Niu Sila ma le Malo o Ausetalia.

2. O Atinae Tetele, Soifua Maloloina

E \$81.9 miliona tala lea ua fuafua mo le atina'e o le soifua maloloina. E tusa lea ma le 16.6% o le tu'uaofa'i o tupe fa'aalu po o le Paketi a le Malo ma o loo atagia ai le tulaga maualalo pe a fua i le tausaga 2013/2014. Ua mafua

lea tulaga ona ua mae'a le tele o galuega toe fa'aleleia ona o le afa o Evani. O vaega nei o le a ave iai le fa'amumua:

- \$7 miliona mo galuega ma auaunaga a le Matagaluega o le Soifua Maloloina.
- \$67.1 miliona ua fa'aagaga mo le Auaunaga Faa-soifua Maloloina.
- \$5.6 miliona ua fuafua e fesoasoani ai i le Faalapotopotoga mo Gasegase Faamama Toto. O lo o tupu pea le aofai o i latou ua aafia o latou totoga fatugao ona o le tele o le tausami o mea lelei ua tupu ai le naunau e taumafa le taofiofi, ia ma ua aoga foi ia nei togafitiga ua mafai ona maua lava i totonu o Samoa.
- \$11 miliona ua fa'aagaga mo gasegase e auina atu i fafo mo togafitiga.
- E \$50,000 le fesoasoani mo le Ofisa Tumaoti mo togafitiga o le gasegase o le ma'i Suka
- E \$30,000 o le a tuuina atu i le Samoa AIDS Foundation; gasegase oti lea e afua i feusuaiga soonafai, ma le
- \$40,000 o le a tuuina atu i le Faalapotopotoga o le Kanesa Cancer Society.

3. **Faatoaga**

O le tolu o atinae tetele e ave i ai le faataua, o le aofa'i o tupe faaalu fuafuaina mo le atina'e o faatoaga e \$13.8 miliona tala;

- \$11.32 miliona o le a tuuina atu mo galuega ma auaunaga a le Matagaluega o Faatoaga.
- \$150,000 o le a fa'aaau ai le polokalame mo le toe uunaia o faatoaga e le polokalame lea e faalupe i le Gagana Peretania o le (stimulus program)
- E \$550,000 o le a faaagaga mo le Faaaliga o Faatoaga. O se tala fiafia le tauaaoina e le Afioga ia Mamea ia se Award po o se Faailoga Taualoga o le ausia e Samoa i le tausaga talu ai o le matatia o le lava o taumafa mo tagata lautele, e toe oo i ai se upu mulimuli.

4. **Atina'e Tetele**

Eletise:

E \$11.25 miliona ua tuuina atu mo le auaunaga a le Malosiaga tau Eletise (EPC). Mai lea aofaiga e \$7 miliona tala e totogi ai lafoga tau suauu, ma le paleni e \$4.25 miliona tala ua faaagaaga mo auaunaga mo nuu ma afioaga i tua.

O le lima ua ave i ai le faamuamua o le Pulega o le Suavai:

Pulega o le Suavai:

E \$20.11 miliona tala o le a tuuina atu mo le Pulega o le Suavai. Mai lea aofaiga e \$5.11 miliona tala ua faaagaga mo auaunaga i nuu ma afioaga i tua. E \$15.0 miliona tala e faatupe ai atina'e tau i suavai lea foi o lo'o fesoasoani mai i ai le Faalapotopotoga o le Iuni a Europa (EU).

O le ono o atinae tetele lea o lo o ave i ai le faamuamua o auala tetele ma auala laupapa sima.

Auala Tetele ma Auala Sima i Vaitafe:

E \$23.9 miliona o le a tuuina atu i le Ofisa o Fela'uaiga i le Laueleele (LTA) mo ana auaunaga. Ua faaitiitia pe a faatusatusa i le tausaga talu ai 2013/14 ona ua tele ina mae'a galuega toe faaleleia mo auala tetele a lo tatou Malo.

O le fitu o galuega tetele o lo o ave i ai le faamuamua o Fesootaiga televavave tau ualesi ma tekonoosi.

Fesootaiga Tau Tekonoosi:

O fesootaiga tau tekonoosi o ualesi televavave o se tasi lenei o vaega taua i le atina'e o Samoa, e faalagolago i ai le tupu atili o atinae uma lava soosoo tauau e pei o aoaoga o le Soifua Maloloina faapea le atinae o Pisinisi aemaise le atinae o Turisi.

- E \$2.1 miliona tala ua faagaga mo galuega faatino a le Matagaluega o Fesootaiga;
- \$1.56 miliona ua fuafua mo galuega faatino a le Ofisa o le Pule Faatonu;
- E \$1.2 miliona ua fuafua e fai ma sao o le Malo e totogi ai auaunaga tau fesootaiga i luga o initaneti po o le National Broadband Highway. O se matati'a iloga lenei atina'e ma o le fesoasoani tele i le saosaoa o fesootaiga tau tekonoosi (internet). E mafai fo'i ona fesoasoani i auaunaga faale aoaoga faapea le Soifua Maloloina ina ia maua e nuu ma afioaga i tua nei ituaiga auaunaga.

O le isi lea vaega tele o le Fonotaga a Atumotu Laiti tau atiae o le lalolagi lea e usuia mai i Samoa i le masina o Setema.

5. Fonotaga a Atumotu Laiti Tauatia'e o le Lalolagi (SIDS2014)

E \$10 miliona ua fuafua mo tapenaga o le taligamalo a Samoa i le fono lenei. O se Fonotaga taua lea ma o le a avea ma auala e faalauiloa atu ai Samoa i le loaloa o le lalolagi aemaise o le tele o avanoa e ono faamanuiaina ai lo tatou atunuu i galuega mo a tatou fanau i le lumanai. E ono oo atu i le tolu afe tagata malaga mai fafo ma e le taumate e tele ni faamanuiaga tau pisinisi e ono afua mai ai. O le Fonotaga mulimuli foi lenei a atunuu laiti o le lalolagi a'o le'i aulia le 2015 ma o iugafono o lenei fonotaga o le a fai ma faavae o alafua mo le atina'e manuia mo le lumana'i o atunuu uma lava o le lalolagi i fuafuaga mamao ua tapenapena nei i ai Malo Aafaatasi i le tuana'i atu o le 2015. O le a avea pea iugafono o le Fonotele lenei e ta'uta'u ai pea foi ma le igoa o Samoa i so o se tulimanu o le lalolagi. O tulaga foi i tapenaga mo le fonotele o lo o sologa lelei mea uma lava o lo o vaevae vaega uma i Komiti eseese o lo o Taitaifono ai Minisita o le Kapeneta ina ia aua lava nei i ai se faaletonu. O le vaega e gafa ma femalagaaiga tau vaalele i le ulufale ma le ulufafo atu mai Samoa e oo lava i vaalele o lea foi o lo o tapena e tatou, ina ia aua nei i ai se mea e faaletonu. E faapea foi i tapenaga ina ua toai taunuu mai i o tatou lafanua mai le malae vaalele i o latou apitaga, ma le malaga ese mai o latou apitaga i le mea e usu ai le fono i aso taitasi. O lo o i ai foi le Komiti o lo o faauluulu ai foi le Minisita Lagolago i le tulaga i le fuafuaina o apitaga ina ia lava. O le ala foi lea ua tatou aumaia ai ma le Meli tele o meli totogi gata o lo o fesoasoani mai i ai le Malo o Niusila ina ia aua lava ne i i ai se faaletonu. O lo o i ai foi fesootaiga ma fale i tua atu o le tatou Malo e ono

tapaina e le Komiti pe afai e alu alu ona atagia mai lea e moomia pea ia nisi apitaga fou. E i ai foi le vaega o lo o gafa ma le puipuiga o le saogalemu, manatua foi i le mea e usuia ai Fonotaga Tetele a Taitai o Malo e i ai lava le faaeteetega ona o le toatele o i latou o le afaaleagamea o lo o tumutumu ai le lalolagi ma o lea foi la o lo o faia i ai ia feiloaiga e le gata i lea, a o fesootaiga foi ma Malo i fafo e ono moomia ai le latou lagolago mai faaopoopo i le puipuiga o Taitai o Malo e auai i lenei fonotaga tele. E faapena foi ma le komiti o lo o i ai e taitai ai foi Minisita o lo o gafa ma fuafuaga o malae e faia ai sauniga ma fale tetele e usuia ai Fonotaga ina ia lava tapena ma ia malu puipuia aua o le taimi e faataunuu ai le Fonotaga lenei ona tuu aloaia atu loa lea i Malo Afaataasi latou te vaaia atoa le puipuiga ina ia aua ne i tulai mai se faaletonu. E i ai foi le Komiti e faapitoa lava i le mea tau fesootaiga, e i ai uaea ma mea faaleotele leo ina ia lava potu e faaliliu ai i gagana eseese le Fonotaga, o mea uma lava ia o lo o maitau uma ina ia aua ne i i ai se faaletonu. E oo lava i le tulaga o sauniuniga faaleoleo ina ne i te i ua tulai mai se faalavelave o se afi ne i te i ua alu alu pe le eletise, ae ua i ai foi fuafuaga faaleoleo ina ne i alu alu le lava le vai. Ua i ai foi fuafuaga faaleoleo atoa ai ma le sapalaiina o le suavai ina ia aua ne i i ai se faaletonu. E lalata i le 2,000 i latou o le a nonofo i luga o le Meli tele o le a taula i totonu o le Taulaga. O mea uma lava ia o lea o lo o faagasolo i ai faatalanoaga ma ua oo mai foi asiasiga a i latou mai Malo Afaataasi ma ua faafogafoga ma silasila i ai i tapenaga ua fai. O le latou tali ua siamu uma mea e leai se mea o faaletonu ma ua toe malaga atu i fafo ma le fiafia.

E ala ona ou taua lea mea, ona o lo o maitauina pea ma le totoa le popole o le Taitai o le Itu Agai. Aua e te popole ne i te i ua e stroke ona leai lea o se isi e taitai maia lena Itu. O lo o lelei mea uma i le tulaga i tapenaga o lo o faagosolo nei.

O le tulaga i Taaloga a Tupulaga Talavou a Malo Afaataasi 2015.

6. Taaloga Tupulaga Talavou Malo o le Taupulega 2015

E \$5 miliona tala o lea ua fuafua mo taaloga a tupulaga talavou o Malo o le Taupulega i le 2015. Manatua foi e tusa ma le limasefulufa le aofai o Malo o le taupulega. O le a i inei uma ma ua atili ai ona ai a tatou atinae tau tagata asiasi maimoa mai. O nei taaloga o le a maua ai ni avanoa mo tupulaga talavou a lo tatou atunuu e tauva ai i fa'agatama Faava o Malo ma siitia ai le loto finafinau ina ia manumalo. O le a tele foi faamanuiaga tau pisinisi e ono maua mai ai. O nei fuafuaga uma o le faamoemoega maualuga ia fua mai i ni atinae fou i galuega fou mo fanau lalovaoa a Samoa. Afai o au o matua fanau o le taimi lenei tatou te gaoioi ai e leai se isi taimi ae soia tatou te fai mea tuu.

VI. TALA FA'AOPOOPO LONA LUA O LE TUPE 2013/2014

Ua tuuina atu faatasi lenei Tala Faatatau Autu o le Tupe 2014/2015 faatasi ma le Tala Faatatau Faaopoopo lona Lua o le Tupe 2013/2014. O lenei Tala Faatatau Faaopoopo lona Lua o Tupe e lē manaomia ni tupe faaopoopo sei vagana ai le toe fetuunaiga o seleni faasao mai lea vaega tupe mai lea vaega tupe e tusa ma le \$1.9m e faamaea ai galuega o lo'o totoe o lenei tausaga faaletupe. O lea tatou te talanoa i le toe fa vaiaso lea e totoe ona uma ai lea o le tausaga lea e faagasolo nei.

VII. UPU FAAIU

Lau Afioga i le Fofoga Fetalai ma le mamalu o le maota, o lenei tala o le tupe o lo’o faavaeina i le sini autu “Toe Tāpu’e le Tamaoiga”. O le toe fotua’i mai o le tamaoiga o se avanoa lelei lea tatou te tāpu’e ai faiga faavae tau tupe e lagolagosua ai i se tamaoiga maua’a ma le malosi.

A tatou taga’i i tausaga ua sola, e matauina ai le anoanoa’i o galuega ma atina’e ua mae’a faatino i le 12 masina ua tuana’i. Ma ou te fia ‘oto’otoina atu nisi o matāti’a ua mae’a ona ausia.

I le masina o Ianuari o le tausaga nei na lautogia ai Samoa e Malo Afaatasi e lē toe avea ma atunuu e vaivai le tamaoiga. O le faalupega o Samoa ua i ai nei, o le Middle Income Level Country i le Gagana Peretania. O lona uiga ua see ese mai tatou i le atunuu mativa i le atunuu ua malosi lona atinae. O se matatia iloga lea tulaga ona ua faapine ai le sologa lelei o le faafoeina o le tamaoiga o Samoa ma le faanaunautaiga ia fausia faiga faavae talafeagai e mausali ai le atinae o si o tatou atunuu o Samoa.

I le tulaga o aoga ma le soifua maloloina, e anoanoai vaegatupe ua faaalu e faaleleia ai faleaoga ma falemai i nuu ma alalafaga i tua. O nisi nuu ua alu le faalua o latou faleaoga fou. E i ai foi nuu e tiga lava faatoa fitu tausaga talu ona uma atu le isi faleaoga fou, a o la e foi ua toe fau le isi faleaoga fou e ono fai ai ni a latou falesiva. Ua maea foi le vaega muamua o le fausia o le falemai tele i Motootua ma ua maitauina ai le matagofie o le falemai ua pei lava o falemai i atunuu i fafo. O le luitau la mo fomai uma lava i Samoa nei ma tausisoifua, afai ua tatou ausia ia tulaga maua’uga i le i ai o fale lelei, mama ma masini, ua faapena foi ona siitia la outou tautua. O le luma faatupuifale i so o se fomai le ave pea i fafo o gasegase e togafiti ai ae turisi solo tatou ma a tatou meafaalogo e faataupeupe.

I le vaega o faatoaga, e lagona le faagaetia ona ua manumalo Samoa i se Faailoga Taualoa a le FAO mo le atunuu muamua lea sa ou taua ua ausia le manulauti o le meleniuma muamua (MDG 1) poo le tafieseaa o le mativa ma le lē tagolima. O se matatia maoae lenei ona o le tele o atunuu o le lalolagi o loo feagai pea ma faafitauli ona o le tele o le mativa ma le lē tagolima i o latou tagatanuu. O loo faagasolo pea foi feutanaiga ma Amerika Samoa mo le faatūina o se fale gaosi apa i’a i Samoa nei e se kamupani mai Amerika, e le mai Amerika Samoa a o le kamupani mai Amerika. Ma o le a tele ni faamanuiaga e ono maua mai ai e le gata i avanoa faigaluega ae faapea foi le siitia o oloa faatau atu i atunuu i fafo.

I le vaega o tagata tafafao maimoa mai fafo, ua ausia foi e Samoa se matāti’a iloga ina ua manumalo le tatou Tusi Kuka i le faailoga taualoa o le **“Best TV Chef Cook Book”**. O le faailoga lenei o le Tusi Kuka o loo faamatalatala ai kuka eseese faa-Samoa e faaoga ai fua o faaeleeleaga e totona lava i Samoa nei. E taua tele lenei tusi a o tapena atu mo le fono tele a le SIDS. O le a avea lenei tusi ma faleaoga taua e aoaoina ai le au kuka aua le kukaina o taumafa mo le SIDS. Sa faia le tauvaga lenei i le aai tele o Beijing i Saina, sa faia i Farani i le tausaga talu ai. Ma o le ausia o le Tusi Kuka lenei o lo o tusia ai kuka eseese a Samoa, o lea ua tau mai ai i i e i latou na faia le faamasinoga, e naunau foi i latou e tausami i meaai a Samoa. O lea la ua faia ai le aoaoga faapitoa e faavae i luga o le Tusi Kuka lenei aua o lea ua alu le tala i le lalolagi atoa, ua alu i le internet. E omai nei la tagata nei, na o le fia ai saka lava, fia taumamafa taufolo. O le mea lea e tupu i o tatou faletalimalo, e

te alu atu i le tele o faleaiga, a tapa atu ou te fia ai i se fai tunu, ae e le maua lena mea. E te fia taumafa i se vaisalo, e leai se vaisalo. E te fia taumafa i se palusami, e le maua se palusami. A o le atamamai ia e kuka mea o kale a Initia ma sapaasui a Saina, ae le iloa falai a tatou panikeke ma mea ia.

Lau Afioga i le Fofoga Fetalai, o le mea maoae i le Tusi Kuka lenei, na tusi e le papalagi, na sau talatalanoa i tagata lautele ma maua mai ai mafauaiga. E le i tusia e se Samoa, ae a outou faitau i ai i le manaia o... e leai se mea e fou, o tatou lava kuka faa-Samoa. E aoga tele mo le tatou Maota nei, aua tatou te malolo nei foi, o atu aumai, na o mea papalagi, mea papalagi, ae tatau ona aumai ni a tatou mea Samoa.

Ua maea foi ona sainia le feagaiga ma le Kamupani a le Neptune Shipping e faapine ai le galulue vaavaalua ma le tatou Malo. O se taunuuga iloga ma maoae lenei feagaiga ma ua talafeauga lelei ma le faatauina e le Malo o le PFL. E faafetai ai i le Minisita ma le aufaigaluega i le mamao o le latou vaai i le atinae. O le atinae lenei, o le atinae na faatu faapitoa lava i le tausaga e 1978 e Malo o le Pasefika ina ia manuia ai Samoa ma Toga, ae fesoasoani mai i ai Ausetalia ma Niu Sila. Ua alu alu, ua tipi fesoasoani na, o lea ua gau le Kamupani Vaa, ae apaapa atu Samoa puepue mai aua le faaauauina pea o galuega, ma ia sologa lelei a tatou fefaatauaiga, aemaise o le lauina mai o oloa.

O le mea lea lau Afioga i le Taitai o le Itu Agai, aua nei outou toe faitio i le atinae taua tele lenei o le a oo ina tautala mai galuega tetele i le lumanai. Ma o lenei faiga faapaaga o le a saga faaleleia ai le fefaatauaiga a Samoa ma atunuu i fafo faapea foi le mautinoa ai o avanoa faigaluega mo alo ma fanau e faauu mai i le tatou Aoga faa-Aliivaa po o Seila, Marine School. A uma nei le tatou Fonotaga ona outou o lea e tilotilo i le maoae o le fale lele toeitiiti uma lea e i gatai atu i i e faaauau ai le aoga lenei.

Ua faasolo nei ina maea le tatou atinae tele o uaealesi fesootai televavave i totonu o Samoa, le National Broadband Highway ma o lo o i ai le faamoemoe e tatala aloaia i se taimi e le o totoe mamao po o le masina fou. O lenei atinae o le a fesoasoani tele i le faaleleia atili o le auaunaga faa-Soifua Maloloina faapea Aoga. O le a faafaigofie ai foi fesootaiga televavave ma nuu ma alalafaga i tua. O lo o faagasolo pea foi le tapenaga mo uaealesi po o mea o uaea ia e fesootai ai i atunuu i fafo e faataatitia i le taele o le moana sausau, le submarine cable ma e talitonu o le a matua saosaoa ai fesootaiga ma soo se atunuu i le lalolagi. O le a faapea ai foi ona tuuaititia ai le tau o fesootaiga ma saga faaleleia ai le auaunaga i luga o peau tafailagi.

I le tulaga o le malosiaga tau eletise, o loo mataitu pea e le Malo ituaiga malosiaga faafouina (renewable energy) e saili ai se malosiaga talafeagai e saga faaitiitia ai le tau o le eletise. Ua i ai foi le faamoemoe o le Malo e oo atu i le 2017, o lona uiga, o le 2014 lenei, 2015, 2016. Ua toe lua tausaga tatou te le toe faaogaina ai ni afi tiso, ua uma ai le toe faalagolago i na mea o suauu palapala a Arapi lea tatou te aumaia. Ua na o le malosiaga faafouina e maua lava i totonu o Samoa, e le toe aumaia mai fafo, o le eletise e maua mai le la, o le matagi, o le susunu o lapisi ma isi lava mau auuala eseese taugofie e maua lava i Samoa nei, o le a atili taugofie ai le eletise.

I le vaega o Faamasinoga, ua maea foi ona faatuina le Faamasinoga e faatautaia mataupu e faasino i aiga (Family Court). E tele lava le mau faafitauli na tulai mai i totonu o le tatou atunuu ma avatu ai le tala vale i fafo i mea lava nei o feeseeseaiga a ulugalii, o lea foi ua tulai mai lea fofo e fofo ai

i se auala vave feeseeseaiga a ulugalii. O se laasaga iloga lea aua o le a tuutiitia ai le umi o talia ai faaiuga o faamasinoga. O le tagofia o mataupu faale-aiga i le Family Court o le a mafai ai ona faasao le taimi o Faamasino e tagofia ai isi mataupu ma saga tuu itiitia ai le taimi e talia ai faaiuga o faamasinoga.

I le agai atu i le lumanai, o le a faaauau pea e le Malo ona faatino atinae tetele e uunaia ai le tamaoaiga faapea foi le faatupulaia atili o avanoa faigaluega mo a tatou fanau. O le faamuamua lava lea aua nei galo ia i tatou, ua tele le fanau palasi o tagata o le tatou atunuu. E tatau foi ona tapenapena tatou ia maua pea galuega mo a tatou fanau. O nisi nei o atinae o loo faatalanoaina nei e aofia ai le Uafu i Vaiusu faapea le toe faaleleia ma faatele atili o le malae vaalele i Faleolo ma fale faatali pasese ina ia pei foi o fale faapena i atunuu i fafo, na ona e oso ese mai lava ma le vaalele e savali sao mai lava i le auala e pipii i le vaalele, e te le toe susu. O a fesuiaiga matagofie ua faia e atunuu i fafo faaneionapo, e tatau lava i le Malo o lo o tu i le foe ona taumafai tatou te faataitai foi i ai. Soia ia le palaaai gofie ma soia ia tou te faitio soo mai outou ia ua masani ai i lenei mea o le fai atu lava o lea mea fai mai ua leai ni tupe, ua tele aitalafu. Taatia mai pea o lo o i ai lava Mose ma le Au Perofeta o lo o latou faafoefoe malie atu le tatou Malo.

E pei ona maitau mai lau Afioga i le Fofoga Fetalai ma sui usufono mamalu, e anoanoai galuega ma atinae ua maea ma isi o loo faagasolo pea, ma o le a faaauau pea galuega a le Malo i le 12 masina o lumanai ina ia ausia pea se tatou tamaoaiga mauaa mo le manuia lautele o le tatou atunuu.

Lau Afioga i le Fofoga Fetalai ma sui mamalu o le Maota, e fia faaleo le agaga o le faafetai ma le faamalo a le tatou Malo i a tatou paaga o lo o saofaga mai i le atinae o Samoa. Faafetai agalelei ma le lagolago mai i le atinae o Samoa.

E fia faamauina foi le faafetai i le mamalu o le atunuu mo la outou lagolagosua mai, aemaise o talosaga aua se manuia o si o tatou atunuu. O la matou tatalo, ia i ai pea le agalelei ma faamanuiaga a le Atua ia Samoa a o tatou agai atu i le faamanatuina o le 52 tausaga o le Tutoatasi o lo tatou Malo.

Lau Afioga i le Fofoga Fetalai, i lou agaga faaaloalo tele, ou te tuuina atu ai le Tala Faatatau Autu o le Tupe mo le tausaga 2014/2015 i luma o le Laulau a Fono a le Palemene.

Soifua ma ia manuia.

Na faaalua le agaga fiafia o le Maota e ala i le patipati o o latou aao i le maea ai o le Saunoaga o le Tala Faatatau o le Tupe 2014/2015.

FOFOGA FETALAI: E tusa ai ma le Tulafono Tumau e 132, o le a tolopoina felafolafoaiga i le Tulafono Tau Faaofi o le Faatatauina o Tupe 2014/2015 e le itiiti ifo ma le 14 aso a o tuuina atu le Tala Faatatau Autu o le Tupe 2014/2015 mo le iloiloga a le Komiti o Tupe Maua ma Tupe Totogi ma toe lipoti mai i le Fono Aoa.

SAUNOAGA FAAFETAI A LE FOFOGA FETALAI

FOFOGA FETALAI: Ia, e momoli atu le faafetai tele i lau Afioga i le Palemia, o lau Afioga foi o le Minisita o Tupe. E talitonu o lea ua maea ona e fofola le fala ma faailo lupemua aua le taulafoga o lenei taeao talatalamalela. O le faamoemoe o le faataatiaina o le tatou Tala o le Tupe 2014/2015 aua le silafia e lo tatou Maota, aemaise foi le faafofogaaga a Samoa. E momoli atu ai le faafetai tele i lau Afioga i le Minisita o Tupe aemaise foi le paia ma le mamalu maualuga o le Matagaluega o Tupe i lenei tapenaga maeaea ma leni tapenapenaga atoatoa. E talitonu le faamoemoe o lea ua faafofoga le Maota i lenei taeao, aemaise le tapuaiga a si o tatou atunuu.

O le a taatia atu le tatou galuega i tulaga masani ma le faasologa o a tatou galuega e pei ona faatulagaina mai i le tatou Tulafono Tumau, aemaise le faasologa o galuega e pei ona masani ai i faiga faa-Palemene ma o le a tuuina atu le 14 aso i le Komiti mo le iloiloga ona faapena lea ona toe tauaao mai i totonu o le tatou Maota Fono aua le lauiluina o lenei Tala o le Tupe.

E i ai le faamoemoe tatou te toe faatasi i le aso 17 o Iuni 2014 mo le lauiluina ma le auauina o le oototoga o le Tala o le Tupe. E manatu foi o lena ua tofua le sui usufono ma faamaumauga ina ia outou lava tapena foi aua le lauiluina o le Lipoti o le Tala Faatatau Autu o le Tupe aemaise ai foi le galuega a le Komiti. E lafo atu i lau Afioga i le Taitaifono ma la outou Komiti, ina ia tuuina mai le tatou Lipoti Aloaia i le tatou Maota aua le faatinoga o le tatou galuega.

E momoli atu ai le agaga faafetai i lenei aso a le Fofoga Fetalai i le onosai mai i le tatou Fono, aemaise o le faatulagaina o le tatou polokalame i lenei taeao, o lea ua tatou faalogologo ma le atoatoa ma le toto. E momoli atu ai le agaga faafetai tele foi i le tapuaiga a si o tatou atunuu – ma ou te talitonu ua tatou taunuu ai i le taunuuga o le tatou Fonotaga i lenei aso. Mo lo outou silafia, a lotea loa mea tau tupe, ia ua ave i ai le faamuamua e ala i a tatou Tulafono Tumau.

O le a tatou faia se malologa o le a tuuina atu le lafo e tolopoina ai le tatou Fono i le taimi aloaia, ae ua maea ona saunia e le tatou Ofisa o le Fono le tatou malu taeao e fai ai se tatou malu taeao pei o le tatou mea masani, o lo o faapena foi ona tapena le tatou taumafataga o le aoauli i le tatou maota pei o tulaga na masani ai.

Ia tatou talosia ia i le Atua ina ia taitaiina lo outou soifua manuia ma lo outou soifua maua i le aso fono ua tuupoina i ai aua le tatou toe faatasi ona o le auiliiliina o le tatou Tala o le Tupe.

Ae lei maea le tatou Fono ou te talosaga atu i lau Afioga i le Minisita Lagolago, se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow e tulai mai mo se tatou tatalo faaiu, ona tolopo ai lea o le tatou Fono.

Na tolopo Taualumaga a le Fono Aoao i le itula e 10:22 i le taeao, seia aulia le Aso Lua, 17 Iuni 2014 e tusa ai ma le Polokalame o Fonotaga a le Palemene 2014.

